

25/05/1997

Abu Zahar pilihan wajar

ALKISAHNYA, nak tergelak teman apabila seorang sahabat berseloroh mengenai kekosongan jawatan pemimpin yang perlu diisi di negeri-negeri. Katanya: "Nampaknya `Abu' adalah nama pilihan sekarang. Di Selangor Abu Hassan jadi Menteri Besar dan Abu Zahar jadi Ketua Menteri Melaka".

Tak tahulah teman sama ada nama Abu itu bertuah. Yang pasti ia adalah nama yang baik. Tetapi pemilihan pemimpin peringkat negeri itu bukanlah atas dasar nama saja. Tentulah banyak perhitungan yang dibuat oleh Datuk Seri Dr Mahathir Mohamad dan Datuk Seri Anwar Ibrahim ketika membuat pilihan.

Barangkali faktor paling utama ialah pemimpin mestilah Mr Clean. Maksudnya mesti bersih. Itu kriteria terpenting. Tapi rakan teman itu masih mahu berseloroh mengenai soal Mr Clean ini. Katanya: "Tolong beritahu siapa yang boleh ditakrif sebagai Mr Clean? Saya fikir yang betul-betul clean ialah vacuum cleaner!"

Maka teman malas juga nak komen. Sebabnya vacuum cleaner pun tak bersih kerana selepas membersihkan tempat yang kotor, vacuum cleaner juga jadi kotor.

Namun, teman percaya kedua-dua tokoh yang dipilih oleh pucuk pimpinan adalah pilihan yang tepat berdasarkan pengalaman dan ketokohan mereka. Abu Zahar adalah anggota Dewan Undangan Negeri kawasan Merlimau. Beliau juga menjawat jawatan Speaker dewan selama dua penggal sejak 1986 sebelum dilantik sebagai anggota Exco pada 1994.

Teman turut mengalu-alukan pelantikan itu dan percaya beliau dapat menjalankan amanah itu dengan cemerlang. Beliau adalah pemimpin yang jujur dan mempunyai reputasi kerja yang baik. Sikap sederhana Abu Zahar akan menjadikannya dihormati dan disegani oleh ahli politik, pegawai kerajaan dan masyarakat.

(END)